

CORONICA 2020

Rusnas da merda

Coronica – Part 11

MARTIN CANTIENI

■ Dasper ils «alternative facts» è «shithole countries» ina da quellas noziuns che l'era Trump ans ha purtà. Avant bunamain trais onns ha il president american titulà uschia pajais africans. Entant sumeglian ils Stadis Unids da l'America en blers aspects quests «shithole countries»: I dat in president vegliet che na vul betg ir, malgrà ch'el ha pers las elecziuns. El instighescha senza paus cunter las medias. Tut quai che n'è betg rapports nuncritics è «fake news». Cun l'armada ha el laschà stgatschar demonstrators per sa laschar fotografar cun ina bibla. Dapi il di d'elecziun discurre el d'in cuntin dad ina falsificaziun da resultats electorals senza preschentar mussaments. I dat milissas armadas ch'al sustegnan. Blers commentaturs politics èn sa fatgs quints ch'i pudess dar erupziuns da violenza – pessimists han temì in putsch e la guerra civila: ina detga merda. Ils fatgs alternativs («alternative facts») percenter n'èn betg ina creaziun da Trump, mabain ina formulaziun dad ina cussegliaadra. Ella l'ha duvrà per giustifitgar indicaziuns falladas davart la grondezza dal public tar l'introducziun en uffizi dal president. Trump aveva blagà ch'el haja gi dapli fans che ses predecessur Obama. Quai è divertent. E forsa era il pli grond problem. Tut las escapadas da Trump han chaschunà atenziun. Ed atenziun è gia ina gronda part da la pussanza. Da tegnair endament per il proxim populist.

Tge è la «C(o)ronica da l'onn 2020»? – Jon Bischoff (illustraziun) e Martin Cantieni (text) commenteschan e parodieschan per la FMR 12 eveniments ch'ans han occupà durant l'onn 2020. Jon Bischoff da Vicosoprano illustrescha la fin da mintga mais per la FMR il «Mais da pais».



ILLUSTRAZIUN JON BISCHOFF